



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Paraser:**

**Alterasaun ba Lei Nú. 3/2014 kona-ba kria Rejiaun Administrativa Espesiál  
Oecusse Ambeno no Estabelese Zona Espesiál ba Ekonomia Sosisiál  
Merkadu (RAEOA-ZEESM): Kestaun Konstitusionaliade no Konseitu  
Divizaun Teritoriál**

**Hato'o ba:**

- 1) Prezidente Repúblika**
- 2) Parlamentu Nasionál**
- 3) Tribunál Rekursu**
- 4) Órgaun no Instituisaun Relevante sira**

## **Tabela Konteúdu**

<b>INTRODUSAUN</b>	<b>3</b>
<b>ANTESEDÉNSIA</b>	<b>4</b>
<b>KONSEITU REJIAUN ADMINISTRATIVA ESPESIÁL</b>	<b>5</b>
<b>KONSEITU ZONA EKONÓMIKA ESPESIÁL</b>	<b>6</b>
<b>BAZE KONSTITUSIONÁL HOSI LEI NÚ. 3/2014</b>	<b>6</b>
<b>LEI NÚ. 3/2014 VERSAUN ANTERIÓR</b>	<b>7</b>
<b>LEI NÚ. 3/2014 VERSAUN ALTERADU</b>	<b>7</b>
<b>PRINSÍPIU SEPARASAUN PODÉR NO DEKLARASAUN INKONSTITUSIONALIDADE</b>	<b>7</b>
<b>KONKLUSAUN NO REKOMENDASAUN</b>	<b>8</b>

## Introdusaun

Uluk-nanain, JSMP hakarak kongratula distintu deputadu sira nu'udar representante povu iha uma fukun Parlamentu Nasionál ne'ebé lori povu tomak nia naran hodi hala'o knaar ne'ebé Konstituisaun haraik ka hatuur iha nia Artigu 96 hodi halo lei, fiskalizasaun no foti desizaun polítika.

Desde 2010, JSMP hahú tau-matan ka monitoriza regularmente servisu Parlamentu Nasionál liuhosi reuniaun plenaria no Komisaun A nian. Iha monitorizasaun sira ne'e, JSMP observa no akompaña diskusaun deputadu sira-nian relasiona ho ezbosu lei sira durante período hirak ne'e inklui partikularmente Projeitu Lei Nú. 3/V (1<sup>a</sup>) kona-ba alterasaun dahuluk ba Lei Nú. 3/2014<sup>1</sup> Kriasaun RAEOA-ZEESM iha plenaria ne'ebé foin liu ba diskuti no alteradu ho Ajenda Nú. 119/V (1<sup>a</sup>), 8 Jullu 2019. Tanba ne'e JSMP familiár no iha koñesimentu adekuaudu relativamente ho prosesu sira iha Parlamentu Nasionál.

Artigu sira ne'ebé sofre alterasaun mak Artigu 19 parágrafo 1) ne'ebé prevee kona-ba kritéria atu sai Prezidente RAEOA-ZEESM, prosesu nomeasaun no mandatu. Iha provizaun uluk ka anteriór, kompeténsia nomeasaun ba Prezidente RAEOA-ZEESM kompete ba Prezidente Repúblika bazeia ba proposta Primeiru Ministru nian no iha provizaun alteradu ne'e, kompeténsia nomeasaun atribui ba Governu, ne'ebé automatikamente kabe ba Primeiru Ministru. Artigu ida seluk mak Artigu 21 parágrafo 1) prevee kona-ba exenorasau ba Prezidente RAEOA-ZEESM ne'ebé provizaun ida uluk atribui kompeténsia ne'e ba Prezidente Repúblika no iha provizaun ida alterasaun atribui ba Primeiru Ministru.

Razaun prinsipál hosi deputadu proponente sira tuir observasaun JSMP nian mak katak provizaun sira uluk ne'e "inkonstitusionál" tanba iha provizaun Artigu 86 Konstituisaun RDTL nian la prevee kona-ba kompeténsia Prezidente Repúblika nian hodi nomeia Prezidente RAEOA-ZEESM.

JSMP mós observa katak iha prosesu diskusaun, bankada opozisaun FRETILIN abandona plenaria hodi la tuir diskusaun no votasaun ho razaun katak bankada governu trata lei ne'e la estruturante no ho urjente de'it no la iha konsultasaun ho bankada opozisaun, inklui sosiedade sivil. Tuir bankada Fretilin bele halo alterasaun maibé presiza haree ba nia implikasaun sira depoisde altera. Enkuantu bankada PD deputadu na'in rua de'it mak tuir diskusaun maibé la vota iha votasaun ba aprovasaun projetu alterasaun ba lei ne'e.

Haree ba realidade ho asuntu ne'e, JSMP sente iha obrigasaun atu kontribui nia hanoin liuhosi halo peskiza ba konseitu teóriku relativamente ba konseitu divizaun territoriál administrativa ho naran "Rejiaun Administrativa Espesiál" no konseitu divizaun territoriál ekonómika ho naran "Zona Espesiál Ekonomia". Aleinde ne'e JSMP mós halo analiza ba provizaun relevante sira iha Konstituisaun no Lei Nú. 3/2014 ne'e rasik.

Observasaun, analiza no interpretasaun ne'e independente tuir JSMP ninia pontu-de-vista rasik no la iha interese ka tendénsia seluk atu apoiu ka benifisia grupu ka partidu balun ligadu ho asuntu ne'e no nune'e mós nakloke ba diskusaun. Nune'e mós atu fornese nosaun no 'leitura alternativa' ba instituisaun

---

<sup>1</sup> Bele haree iha Jornál Repúblika: <http://www.mj.gov.tl/jornal/?q=node/6670>

kompetente sira antes halo desizaun ba asuntu ida-ne'e hodi hametin ita-nia demokrasia no instituisaun demokrátiku sira.

Iha paraser ne'e mós, JSMP la pronúnsia kona-ba kestaun inkonstitusionaliade tanba ida-ne'e kabe ba kompeténsia Tribunál Rekursu/Tribunál Supremu Justisa nian kuandu Prezidente Republika konsidera atu utiliza knaal ida-ne'e hodi halo apresiasaun no fiskalيزasaun antes veta ka promulga.

Paraser ne'e ho natureza opiniaun nune'e la iha forsa atu kesi no obriga parte balun atu halo-tuir. Paraser ne'e simplesmente hanesan hanoin de'it no kabe ba órgaun sira Estadu atu tetu no hakotu. JSMP nia interese mak atu asegura de'it katak desizaun hothotu ne'ebé Estadu foti tenke bazeia ba norma sira iha Konstituisaun no lei relevante sira relasiona ho asuntu ne'e hodi promove no garante interese nasional bazeia ba prinsipiu sira Estadu Direitu Demokrátiku nian<sup>2</sup>.

JSMP fiar no konvensidu katak, se Estadu nia órgaun soberanu sira la foti desizaun ne'ebé di'ak no prudente tuir norma konstitusionál no kuadru legál sira, sei hamosu presedénsia ida ne'ebé la di'ak ba jersaun sira tuirmai no sei prodús efeitu negativu no risku ba dezvoltamentu demokrasia iha Timor-Leste.

## **Antesedénsia**

Tuir rezultadu observaun JSMP nian, iha 2014, deputadu sira, partikularmente partidu boot sira mak hanesan Parditu CNRT, FRETILIN no PD partisipa ativamente iha diskusaun no aprovasaun ba Lei Nú. 3/2014 hodi kria RAE OA-ZEESM iha finál globál iha 23 Maiu 2014 ho unánimu ho total votu afavor 55, kontra 0 no abstensaun 0<sup>3</sup>. Iha momentu ne'ebá, la iha deputadu ida ka bankada ida kestiona kona-ba kestaun "inkonstitusionalidade" no hothotu hatan. Maibé depoisde tinan 5, partidu polítiku CNRT ne'ebé iha momentu ne'ebá nu'udar partidu maioria ne'ebé aprova lei ne'e, kestiona kona-ba konstitusionalidade ba produitu lei ne'ebé mak sira rasik aprova. JSMP fiar katak iha demokrasia, polítiku sempre dinámiku maibé tenke nafatin refléta ba norma konstitusionál no lei aplikavel sira hodi hametin ita-nia demokrasia no soberanu estadu nian.

Asaun no desizaun polítika sira ne'e tuir observaun JSMP la refléta ho di'ak prinsipiu no konsisténsia polítika hosi polítika na'iin sira ne'ebé uluk aprova lei ne'e, tanba kontesta rasik sira-nia desizaun. Prátika sira hanesan ne'e sai presedénsia no referénsia ne'ebé la di'ak ba polítika sira tuir mai iha futuru. Asaun polítika sira hanesan ne'e, bele hamosu dúvida ba pública kona-ba desizaun sira ne'ebé Parlamentu Nasionál foti lori povu nian naran.

JSMP ninia pontu reflesaun no interogasaun boot liu mak relasiona ho pozisaun deputadu proponente sira ne'ebé konsidera Lei Nú. 3/2014 hodi kria RAE OA-ZEESM ne'e inkonstitusionál. Pozisaun ne'e legalmente implika ba ezisténsia polítika divizaun Rejiaun Administrativa Espesial. Nosaun ida-ne'e iha implikasaun legal-jurídiku tanba se artigu sira anteriór kona-ba nomeasaun konsidera inkonstitusionál, ne'e signifika

<sup>2</sup> Bele iha artigu ida ne'e, iha P. 23-24: <http://bibliotecadigital.fgv.br/ojs/index.php/rda/article/%20viewFile/45920/44126>

<sup>3</sup> Bele haree iha relatóriu anuál JSMP kona-ba Parlamentu Nasionál 2014 nian iha P. 6 iha ne'e: [http://jsmp.tl/wp-content/uploads/2012/05/150428-Relatoriu-PWP-for-printing\\_TETUM.pdf](http://jsmp.tl/wp-content/uploads/2012/05/150428-Relatoriu-PWP-for-printing_TETUM.pdf)

katak obra no prosesu ka aktu administrativu sira relaciona ho produktu dezenvolvimentu iha RAEOA-ZEESM ne'e inválidu ka nulu tanba kestaun inkonstitusionál iha prosesu inísiu kona-ba nomeasaun ba Prezidente Autoridade RAEOA-ZEESM nu'udar autoridade másimu ne'ebé ezejuta política RAEOA-ZEESM nian. Nune'e, tenke anula fali desizaun no aktu administrativu sira ne'ebé halo bazeia ba lei ne'e tanba aktu lejislativu ne'ebé la tuir Konstituisaun RDTL ne'e konsidera mate ka inválidu hanesan prevee iha Artigu 2 parágrafu 3) Konstituisaun RDTL.

## **Konseitu Rejiaun Administrativa Espesiál**

Konseitu rejiaun administrativa espesiál hanesan política divizaun teritoriál administrativu ne'ebé sai nu'udar política jestaun Estadu nian kona-ba oinsa bele jere ho fasilmente nia rain no asuntu sira sidadaun nian ka atu habesik ho di'ak liu tan servisu Estadu nian ka administrasaun ba sidadaun sira<sup>4</sup>. Divizaun administrativu ne'e nu'udar entidade sub-nasionál ida ne'ebé Estadu iha grau balun fó autonomia hodi halo jestaun no administrasaun rasik liuhosi governu lokál. Instrumentu prinsipál balun ne'ebé sai hanesan sasukat ba Estadu hodi halo divizaun teritoriál ne'e mak hanesan istória, lisan-kultura, ekonomia, lokalizasaun geográfika, nsst.

Iha modelu ka tipu oinoin hosi divizaun administrativa ne'e rasik. Iha Portugal, divizaun ne'e hahú hosi Governu sentrá, distritu depois fahe tan ba munisípiu sira no munisípiu sira fahe tan ba fregesia (fregesia) no iha mós rejiaun autónoma<sup>5</sup>. Iha España divizaun ne'e hahú hosi Governu sentrá, província no munisípiu, inklui mós comunidade no cidade autónoma<sup>6</sup>. Província, munisípiu no fragezia sira ne'e hanesan governu lokál ne'ebé iha knaar atu jere de'it nia teritóriu maibé la iha kompeténsia atu ezejuta no halo lejzlasaun ba materia sira ne'ebé liga ho asuntu edukasaun, saúde no abitasaun hanesan rejiaun no comunidade ka cidade autónoma sira. Iha Estadu federál sira, nia divizaun administrativa bolu estadu federadu ne'ebé grau autonomía mós aas/luan liu kompara ho rejiaun no comunidade ka cidade autónoma sira. Estadu federadu sira ne'e iha autonomia política no kapasidade ba auto-organizasaun no autolejzlasaun, autogovernasaun no auto-administrasaun<sup>7</sup>.

Konseitu divizaun administrativu ho naran "Rejiaun Administrativa Espesiál" ne'e aplika iha Estadu Xinéz<sup>8</sup>. Divizaun administrativa ida espesiál ne'e la hanesan ho divizaun administrativa jerál ka komún sira temi iha leten. Divizaun administrativa Xina nian ne'ebé aplikaonseitu rejiaun administrativa espesiál ne'e mak hanesan Makau no Hongkong, inklui Taiwan. Rejiaun sira ne'e iha sira-nia xefe governu rasik, parlamentu rasik, tribunál no lei rasik, inklui osan ka moeda rasik, militar rasik hanesan Taiwan<sup>9</sup> no to'o Taiwan nia sistema política ketak ne'ebé koñesidu ho "Estadu ida sistema rua (one country two systems)"<sup>10</sup>.

<sup>4</sup> Bele haree artigu ida kona-ba divizaun teritoriál iha Brazil relaciona ho kriasaun munsípiu: [http://jsmp.tl/wp-content/uploads/2012/05/150428-Relatoriu-PWP-for-printing\\_TETUM.pdf](http://jsmp.tl/wp-content/uploads/2012/05/150428-Relatoriu-PWP-for-printing_TETUM.pdf)  
<http://www.ub.edu/geocrit/coloquio2012/actas/11-A-Cigolini.pdf>

<sup>5</sup> Bele haree deskrisaun ho detallu iha ne'e: <http://www.mslima.com/sop/divisoos/>

<sup>6</sup> Bele haree iha artigu ida ne'e:

[http://www.cnse.es/inmigracion/index.php?option=com\\_content&view=article&id=499&Itemid=640&lang=pt](http://www.cnse.es/inmigracion/index.php?option=com_content&view=article&id=499&Itemid=640&lang=pt)

<sup>7</sup> Bele haree informasaun detallu iha artigu ne'e: <https://lpneto.jusbrasil.com.br/artigos/168976102/a-natureza-juridica-dos-estados-federados>

<sup>8</sup> Bele haree artigu ida ne'e: [https://pt.wikipedia.org/wiki/Regi%C3%A3o\\_administrativa\\_especial](https://pt.wikipedia.org/wiki/Regi%C3%A3o_administrativa_especial)

<sup>9</sup> Bele haree iha artigu ida ne'e: [https://www.wikiwand.com/pt/Regi%C3%A3o\\_administrativa\\_especial](https://www.wikiwand.com/pt/Regi%C3%A3o_administrativa_especial)

<sup>10</sup> Bele haree iha artigu ida ne'e:

[http://www.ipm.edu.mo/cntfiles/upload/docs/research/common/1country\\_2systems/issue1/pt/p65.pdf](http://www.ipm.edu.mo/cntfiles/upload/docs/research/common/1country_2systems/issue1/pt/p65.pdf)

Ida ne'e, signifika katak rejiaun administrativa espesiál ne'e, Estadu atribui ba nia autonomia no kompeténsia ne'ebé boot kompara ho divizaun administrativa komún sira hanesan provínsia, distritu no munisípiu sira. Asuntu sira ne'ebé governu rejiaun administrativa espesiál labele trata rasik mak polítika esterna no defeza nasional. Nune'e, ninia xefe governu ne'e nia nível sei la hanesan ho presidente autoridade distritál no munispál sira. Nia nível ne'e, haree ba kontestu Makau no Hongkong nia xefe governu ne'e nível hanesan hanesan "Primeiru Ministru", tanba iha nia estrutura governu ne'ebé bolu Konsellu Ezekutivu atu hanesan ho Konsellu Ministru. Enkuantu Taiwan, iha xefe estadu eleitu no xefe governu nomeadu. Nune'e, xefe governu Rejiaun Administrativa Espesiál ne'e automatikamente hanesan "membreu governu". Rejiaun Administrativa Espesiál ne'e só hakruuk de'it ba Konstituisaun Repúblika, tanba nia iha autonomia no kompeténsia atu kria nia lei rasik no iha xefe governu rasik.

Bainhira haree ba konseitu no realidade ida ne'e, bele hamosu kestaun ida mak hanesan ne'e: Serake lei espesifiku ne'ebé regula kona-ba kriaun rejiaun administrativa espesiál ba Oecusse Ambeno ne'e refleto ba konseitu no realidade ida ne'e ka asegura duni tratamentu espesiál Estadu nian ba divizaun administrativa ida ne'e tuir provizaun Artigu 5 no &71 Konstituisaun RDTL nian? Provizaun sira uluk mak relevante liu no han malu ho Konstituisaun ka provizaun sira alteradu ne'e mak relevante liu no han malu ho Konstituisaun? Resposta hosi kestaun sira ne'e, sei haree hosi analiza no interpretasaun ba provizaun relevante sira Konstituisaun no Lei Nú. 3/2014 versaun antigu no versaun foun ka alteradu iha tópiku kona-ba Baze Konstitusionál hosi Lei Nú. 3/2014.

## **Konseitu Zona Ekonómika Espesiál**

Zona ekonómiku espesiál ne'e mós liga ho divizaun teritoriál ne'ebé haree liu kona-ba polítika Estadu nian kona-ba oinsa mak bele halo jestaun ida ne'ebé di'ak no efektivu iha termu ekonomia no tributasaun. Konseitu ida ne'e mós Governu Xina mak kria no adota bainhira nia loke nia ekonomia ka merkadu ba investimentu hosi rai-li'ur<sup>11</sup>. Iha rejiaun ne'ebé adota no aplika zona ekonómika espesiál, lei atribui direitu ekonómiku no tributáriu ne'ebé la hanesan ka ketak ho teritóriu sira seluk hodi dada investimentu hosi rai-laran no rai-li'ur no hodi insentiva dezvoltamentu ekonómiku rejiaun nian.

Nune'e, zona ekonómika espesiál ne'e han malu ho di'ak ho rejiaun administrativa espesiál tanba governu rejiaun ne'e iha kompeténsia atu kria nia lei rasik hodi regula nia atividade ekonómika, tributária no finanseira. Nune'e, zona ekonómika espesiál ne'ebé adota no aplika iha Oecusse Ambeno ne'e refleto duni natureza zona ekonómia espesiál ne'e. Importante mak Estadu presiza liuhosi Lei Nú. 3/2014 haraik tan kompeténsia ne'ebé boot liu tan, la'ós pelu-kontraui limita tan nia kompeténsia.

## **Baze konstitusionál hosi Lei Nú. 3/2014**

Lei Nú. 3/2014 ne'e kria bazeia ba provizaun Artigu 5 parágrafu 3) no Artigu 71 parágrafu 2) Konstituisaun Repúblika nian ne'ebé prevee kona-ba tratamentu espesiál iha termu administrativa no ekonómika ba Oecusse Ambeno. Mezmu nune'e, presiza haree no analiza didiak konteúdu hosi lei ne'e rasik, tantu versaun ida anteriór nune'e mós versaun ida sofre alterasaun hodi asegura katak lei ne'e refleto duni konseitu no natureza divizaun administrativu ne'e ka lae no han malu ho Konstituisaun ka lae.

---

<sup>11</sup> Bele haree iha artigu ida ne'e: [https://pt.wikipedia.org/wiki/Zonas\\_Econ%C3%B4micas\\_Especiais\\_da\\_China](https://pt.wikipedia.org/wiki/Zonas_Econ%C3%B4micas_Especiais_da_China)

### ***Lei Nú. 3/2014 versaun anteriór***

Tuir JSMP nia haree no analiza, versaun lei ida ne'e atribui ona autonomia no kompeténsia balun iha forma limitada ba governu rejiaun administrativa espesial ne'e. Lei ne'e mós seidak refléta ho di'ak konseitu no natureza divizaun teritorial ho modelu rejiaun administrativa espesial ne'e rasik. Iha kontestu Timor-Leste, partikularmente Oecusse Ambeno nian ne'e rezoavel, mezmú nun'e'e, presiza atribui tan kompeténsia ne'ebé boot tan.

Enkuantu nia provizaun Artigu 19 no 21 kona-ba prosesu nomeasaun ne'ebé kompeténsia atribui ba Prezidente Repúblika ne'e, JSMP konsidera han malu ho Konstituisaun, tanba Prezidente Rejiaun Administrativa Espesial hanesan xefe governu no nu'udar membru Governu hanesan prevee iha Artigu 86 alinea h) kona-ba nomeasaun, fó tomada pose no hasai membru governu sira, ne'ebé la hanesan ho presidente autoridade distritál ka munisipál sira. Membru governu ne'e mak tuir provizaun Artigu 104 parágrafu 1) no 2) Primeiru Ministru, Ministru, Viseministru no Sekretáriu Estadu. Bainhira trata hanesan ho presidente autoridade distritál ka munisipál sira mak nia lakon ona niania tratamentu administrativu espesial ne'e, no ida-ne'e, halakon/hamete ona karaterístika rejiaun administrativa espesial nian. Nune'e, JSMP hanoin katak provizaun sira ne'e la kontráriu ho Konstituisaun no bainhira atu altera karik, di'ak liu atu hasa'e tan de'it nia nível ka grau autonomia, la'ós atu hamenus fali.

### ***Lei Nú. 3/2014 versaun alteradu***

Tuir JSMP nia hanoin, ho alterasaun ba provizaun iha Artigu 19 no 21 hodi atribui fali kompeténsia nomeasaun ba Governu ka Primeiru Ministru, hakloot ka hamenus liu tan autonomia no kompeténsia rejiaun administrativa espesial ne'e no lakon ona tratamentu administrativa espesial ne'e tanba kompeténsia ki'ik liu tan no karatér ida rejiaun administrativa espesial ne'e totalmente lakon.

Enkuantu relevánsia ho Konstituisaun, tuir JSMP nia haree no analiza, provizaun alteradu rua ne'e la tuir ona Konstituisaun. Provizaun Artigu 5 no 71 Konstituisaun prevee tratamentu administrativa espesial ba Oecusse Ambeno no provizaun Artigu 115 kona-ba kompeténsia Governu nian no Artigu 116 kona-ba kompeténsia membru governu sira-nia la prevee kona-ba kompeténsia atu nomea no ezenora membru governu ida ka membru governu seluk. Nomeasaun ba membru governu so kompete eskuzivamente ba Prezidente Repúblika hanesan prevee iha Artigu 86 alinea h) Konstituisaun. Ne'eduni, JSMP hanoin katak alterasaun ba provizaun artigu sira ne'e la refléta no halakon karatér konseitu rejiaun administrativa espesial no kontráriu ho provizaun konstitusionál sira relativamente ba asuntu ne'e.

## **Prinsípiu Separasaun Podér no Deklarasaun Inkonstitusionalidade**

Iha provizaun Artigu 2 parágrafu 3) Konstituisaun RDTL prevee ona katak lei no aktu sira Estadu no podér lokál só válidu bainhira tuir Konstituisaun ka la kontráriu ho Konstituisaun. Atu asegura kumprimentu ba norma no prinsípiu ida ne'e, Konstituisaun mós haraik knaar no kompeténsia ida ne'e ba órgaun judisiáriu. Iha provizaun Artigu 124 parágrafu 2) Konstituisaun RDTL prevee katak Supremu Tribunál Justisa (STJ) mak iha kompeténsia atu administra justisa iha materia jurídiku-konstitusionál no eleitorál. Iha provizaun Artigu 126 parágrafu 1) alinea a) prevee katak STJ mak iha kompeténsia atu apresia no deklarar inkonstitusionalidade no ilegalidade ba aktu lejislativu no normativu sira hosi órgaun sira Estadu nian. Nune'e, atu asegura órgaun soberanu sira Estadu nian funsiona ho di'ak no la hamosu konfliktu entre sira, Konstituisaun mós prevee kedas prinsípiu separasaun podér ne'ebé konsagra iha Artigu 69 katak órgaun

soberanu sira iha sira-nia relasaun resíproka no ezersísiu sira-nia funsaun tenke respeitu prinsípiu separasaun podér no interdependénsia iha podér sira ne'ebé estabelese ona iha Konstituisaun.

Bazeia fundamentu konstitusionál sira ne'e, Parlamentu Nasionál la iha baze konstitusionál atu deklara inkonstitucionalidade ba provizaun balun hosi Lei Nú. 3/2014 no aktu ne'e konsidera inkonstitusionál tanba viola ona prinsípiu separasaun podér no intervein ona ba podér judisiáriu nian.

Bainhira Parlamentu Nasionál deteta katak iha provizaun legál ruma mak kontráriu ho Konstituisaun, Konstituisaun nafatin fó dalan ba Parlamentu Nasionál ka deputadu sira hodi husu ba STJ atu halo fiskalizasaun ba aktu lejizlativu no deklara inkonstitucionalidade hanesan prevee iha Artigu 150 alinea e). Artigu 150 (e) ne'e estabesele rekizitus ne'ebé defini katak atu rekere deklararasaun inkonstitusionaliade presiza mínimu 1/5 deputadu hosi totál deputadu efetivu iha Parlamentu Nasionál ka mínimu deputadu na'in 13 hosi 65. Nune'e, bainhira STJ ne'ebé agora dadaun Tribunál Rekursu (TR) mak simu hela knaar ne'e, seidak pronúnsia inkonstitucionalidade ba provizaun sira ne'e, provizaun sira ne'e sei nafatin válidu. Razaun Parlamentu Nasionál hodi altera lei ne'e ho razaun inkonstitucionalidade la liu hosi fiskalizasaun STJ/TR nian ne'e konsidera aktu ne'ebé kontráriu ho Konstituisaun.

Bainhira Parlamentu Nasionál la kumpri provizaun no prinsípiu fundamentál sira ne'ebé konsagra iha Konstituisaun mak aktu sira ne'e sei konstitui infrasaun no ameasa boot ida ba prinsípiu fundamental Estadu-Direitu-Demokrátiku no sei sai referénsia no presedénsia ne'ebé la di'ak iha futuru. Pratika sira hanesan ne'e hatudu imajen no impresau ne'ebé kontra-produtivu ho obrigasaun konstitusionál estadu Timor-Leste ba comunidade internasionál atu promove no hametin demokrasia iha Timor-Leste.

## **Konkluzau no Rekomendasaun**

Bazeia realidade, analiza, rezaun no fundamentu legál no konstitusionál sira, liuliu ba interese nasionál, JSMP konklui katak hanoin no iniciativa Parlamentu Nasionál nian hodi altera Lei Nú. 3/2014 mezmuke di'ak, maibé la refleta ho di'ak realidade, konseitu divizaun territorial, espíritu Konstituisaun nian no interese nasionál nomós la iha fundamentu konstitusionál ida ne'ebé bele haforsa alterasaun ne'e.

Nune'e, JSMP rekomena atu:

- 1) Prezidente Repúblika tetu didi'ak molok promulga lei ne'e;
- 2) Parlamentu Nasionál presiza haree no halo estudu no diskusaun ne'ebé di'ak no kle'an, inklui haree ba kestaun konstitucionalidade molok dezenvolve ezbosu lei ruma ka projeta alterasaun ba lei existente sira;
- 3) Parlamentu Nasionál bainhira altera Lei Nú. 3/2014 hodi fó tan kompeténsia ba RAEOA-ZEESM atu halo regulamentasaun no jestaun ne'ebé efetivu no efisiente liu tan iha área hothotu, partikularmente área ekonómika no tributaria, la'ós atu halakon ka hamenus tan;
- 4) Deputadu no bankada parlamentár sira haree ba realidade no kontestu Timor-Leste nian, di'ak liu lalika abandona reuniaun sira iha plenaria no Komisaun sira bainhira trata asuntu sira ho nível interese nasionál aas, nune'e bele nafatin kontribui ba fó hanoin no deklarasaun relasiona ho pozisaun polítika ba asuntu relevante sira no iha obrigasaun tuir lei atu vota bainhira marka prezensa iha reuniaun sira ne'e, mezmuke abandona plenaria ne'e nu'udar direitu no liberdade polítika iha Estadu Direitu Demokrátiku;
- 5) Parlamentu Nasionál atu observa ka respeita prinsípiu separasaun podér ne'ebé konsagra iha Konstituisaun RDTL nune'e la hamosu konfuzaun no konfliktu iha ezersísiu funsaun sira;



- 6) Tribunál Rekursu presiza halo analiza no tetu didi'ak kona-ba kestaun inkonstitusionalidade relasiona ho Lei Nú. 3/2014 bainhira Prezidente Repúblika husu Tribunál nia paraser.

Dili, 25 Jullu 2019

Casimiro dos Santos  
Diretór Ezekutivu Interinu JSMP